

20/04/2018

LA USC di LADINES

Al Muse con Transdolomites, convegno sul viac

La sociazion vidèda da Massimo Girardi l'ha endrezà na scontrèda a Trent per rejonèr de esperienzes de viac alternatives. L'ha tout pèrt ence la joena da Poza Consuelo Tomasi

Mobilità - La sociazion Transdolomites en mercol ai 18 de oril l'ha endrezà al Muse de Trent l convegn "L viac, ocajon per la descorida de la realtèdes teritorièles e moment de arichiment dal pont de veduda del cognoscer, cultural, uman e profesionèl".


Chesta scomenzadiva, l'ha deschiarà

l president Massimo Girardi, la se pouc ai joegn, tant studenc che jà fora de scola, che i é stac envié a portèr dant sia esperienzes de viac a pe, con la roda, con mesi publics, vivudes da soi o en grop.

L'é stat metù l'atenzion sul se mever entenù desche esperienza formativa del viac de istruzion e

forma de arichiment da desvalives ponc de veduda. Na ocajon emportanta donca per fèr esperienza sul tem de l'azet, de la reflesion entorn al besegn del respet de la identitèdes locales, de la desvalivanzes e de la valorisazion e stravardament del patrimoniè materièl e nia materièl, a una con na vijion e na pratega slarièda de l'idea de sostenibilità.

L program à portà dant desvalives intervenc, orii dal president Girardi: Annibale Salsa del comitat scientifich STEP Scola per l goern del paesaje, la scola mesèna de Giovo con sie viac de istruzion a Dispruch, Gabriele Dovolavilla, con n viac jir e vegnir fat con roda e mesi publics da Fiem a Ampez e la medema sociazion Transdolomites, che à portà dant l viac fat con la ferata Maran Malles e chela del Bernina. Anter chisc a rejonèr l'é stat ence la joena da Poza Consuelo Tomasi, che à portà dant l'esperienza del Liceo ladin di lengac "Da Fascia a l'Engiadina viajan con i mesi publics".



La ferata de l'Engiadina.

8/1/2018